



一大袋蘿蔔錢

「麼人啊？偷擲吾蘿蔔仔啊！」親家公騎等自行車樂樂仔箭等來，遠遠就煞猛出聲。

「若婿郎啦，還帶人來偷擄哦！」係阿細舅帶一陣都市戇來環市道路脣掛蘿蔔仔。

「喺，鄰舍來同佢報，講有人偷擲吾蘿蔔仔喺，好哇，擲淨來啊！該啊，戇猴，肚項該坵較大條啦！過該啊，白菜、芫絲仔同佢擲淨來喺，人家愛來蔭水了。」臨暗仔个日頭下，一陣大人細子擲到生趣生趣，又煞煞徒步去肚項該坵放勢牯擲，親家公捉賊變指揮，喊佢兜煞煞撈厥蘿蔔仔擲走。七十零歲个老人家守顧等大路脢闊闊个田坵仔，無力好耕了，又愁佢兜生草毋得結煞。好得，這下連田事乜有專業个代工，放水、蒔田、巡田水、拏草、割禾，一抹煞通包，錢拜託人耕。盡尾枋个禾仔割忒，拜託佢點兜仔蘿蔔仔、菜仁仔好留分在都市打拚个世細過年，乜毋係麼个大問題。

「親家公，今年仰無金嬌仔呢？」白肉、幼嫩，聘得毋會苦个金嬌仔，想到會流口涎了。

「哦，該較早，兩禮拜仔就煞(sod)忒了，過時了，無了，愛等過忒年。」

第二年，擲蘿蔔部隊早早就出動，官盡大个大蘿蔔、大等个金嬌仔，一布袋、兩布袋先撈人落(lau)轉去過年，阿舅講一袋分阿舅姆打蘿蔔板，一袋佢拿轉去好煮分細人仔食。大蘿蔔煲排骨有醃醃大蘿蔔个味緒，緊暖就緊香；金嬌仔幼皮白肉，煲湯、燻起來燴蒜仔，味緒還係恁幼秀又甜香，可惜都市無所在好晒蘿蔔錢，係有好晒起來，想食就有了。

第二隻月，阿舅拿出一大袋萋萋个蘿蔔錢堵到吾手項，害佢看著目汁忍等險險內傷。該係趕日心仔晒起來个蘿蔔錢，舐酥、白淨，愛日頭烈烈該下晒正有恁靚个色水，愛尋盡淨个位所加紗網去晒，正做得無黏著半點泥沙仔。想著身體無異好个阿舅，在恁烈个日頭下一皮一皮仔晒蘿蔔錢，異毋盼得。該一皮一皮仔勻大勻大个蘿蔔錢，還係用金嬌仔晒个呢。

「媽，這蘿蔔錢湯還甜哦！」該還使講，惜入心个蘿蔔錢煮半肥靚个三層肉，當然乜甜。想食就有个蘿蔔錢，佢一細撮一細撮仔省等煮，好分該香入心个味緒在心肝肚定定仔定疊。

作者：彭瑞珠

☆詞彙學習☆

【毋得結煞】 mˊ ded` gad` sad`：不好收尾。

【聘得】 pin` ded`：絕對、保證。

【一抹煞】 id` mad` sad` : 全部。

【世細】 sii se：晚輩。

【金嬌仔】 gim' gieu' eː 白蘿蔔的一種，體型小而細長；美濃白玉蘿蔔。

【日心仔】ngid` xim` e`：太陽熾烈的當午。

【定疊】 tin tiab : 沉澱，穩定。

☆文法學習☆。

【𪗇酥】guag suˊ：很酥脆。「𪗇+酥」是「狀中結構」的形容詞，副詞性成分的「𪗇」在詞中為「酥」修飾語，表示「酥」的程度很高，有強調的效果。同樣結構的詞彙，還有「𪗇精（非常聰明）、𪗇壁（筆直）、𪗇軟（非常軟）、𪗇碎（碎爛）」等等。

例：衫晒到差硬，硬確確仔愛仰般著呢？（衣服晒得那麼硬，硬邦邦的要怎麼穿啊？）

例：油桐花開到滿山蓬白，白蓬蓬仔就像五月雪。（油桐花開得滿山雪白，白茫茫的就像五月雪。）